

आकाशवाणी

खबरां

1. प्रधानमंत्री नरेन्द्र मोदी होरें आक्खेआ ऐ जे 2014 मगरा खेडें च भारत दा प्रदर्शन लगातार बेहतर होआ ऐ। उत्तर प्रदेश दे वाराणसी च, 72में राष्ट्रीय वॉलीबॉल टूर्नामेंट दा ऑनलाइन उद्घाटन करदे होई उने आक्खेआ जे भारत 2036 च ओलिंपिक खेडें दी मेज़बानी दा प्रबल दावेदार ऐ।
2. ग्रामीण विकास मंत्री शिवराज सिंह चौहान होरें आक्खेआ ऐ जे मनरेगा भ्रष्टाचार दा इक पर्याय बनी चुकी दी ही, जित्थे मजदूरे गी अकसर दरकिनार करिए उन्दा शोषण कीता जन्दा हा।
3. भारत नै वेनेजुएला दे हाल दे घटनाक्रम पर ढूंगी चिन्ता जाहिर कीती ऐ। विदेश मंत्रालय नै इक बयान च आक्खेआ जे भारत, वेनेजुएला दी स्थिति पर नेडमी तक्क रक्खा'रदा ऐ।
4. सरकार नै भारतीय लोकें गी वेनेजुएला दी गैर जरूरी यात्रा नेई करने दी सलाह जारी कीती ऐ।
- 5 बांग्लादेश हिन्दू-बौद्ध-ईसाई एकता परिषद दे नेताएं बांग्लादेश नेशनलिस्ट पार्टी - बीएनपी दे कारजकारी अध्यक्ष तारिक रहमान हुन्दे कन्नै राजधानी ढाका च मलाटी कीती ते पार्टी दी अध्यक्ष ते साबका प्रधानमंत्री बेगम खालिदा ज़िया हुन्दा काल होई जाने पर दुख ते बसोस जाहिर कीता। उनें मुल्ले च अल्पसंख्यक समुदाय खिलाफ हिंसा पर बी ढूंगी चिन्ता जाहिर कीती।
- 6 मौसम विभाग नै अज्ज दिल्ली, हरियाणा, चंडीगढ़, पंजाब, उत्तर प्रदेश, बिहार ते ओडिशा आस्तै घने कोहरे दा ऑरेंज अलर्ट जारी कीता ऐ।



PM Volleyball

प्रधानमंत्री नरेन्द्र मोदी होरें आक्खेआ ऐ जे 2014 मगरा खेडें च भारत दा प्रदर्शन लगातार बेहतर होआ ऐ। अज्ज उत्तरप्रदेश दे वाराणसी च, 72में राष्ट्रीय वॉलीबॉल टूर्नामेंट दा ऑनलाइन उद्घाटन करदे होई उने आक्खेआ जे भारत 2036 च ओलिंपिक खेडें दी मेज़बानी दा प्रबल दावेदार ऐ। मोदी होरें आक्खेआ जे उन्दी सरकार नै खेड दे क्षेत्र च केई सुधार कीते न जिन्दे च राष्ट्रीय खेड प्रशासन अधिनियम ते खेलो भारत नीति शामिल ऐ। उने आक्खेआ जे देशे दा खेड मॉडल खडारिएं दे अनुकूल ऐ ते इस करी पिच्छले बरें च खेडें च अस सफल राए आं। प्रधानमंत्री होरें आक्खेआ जे सरकार खेड प्रतिभाएं दी पन्ध्यान, उन्दी सेई चाल्ली दी सिखलाई, पोषक आहार ते पारदर्शी खडारिएं दी ताल पारदर्शी ढंगै सिर होई सकै, एह्दे पर ध्यान देआ'रदी ऐ। उने आक्खेआ जे भारत गी अपने युवा खडारिएं पर मान ऐ जेडा देशे दा ना रोशन करा र दे ना। मोदी होरें आक्खेआ जे जिसलै हर कोई अपनी जिम्मेदारी दा पालन करदा ऐ तां गै सफलता छहोन्दी ऐ ते देश इसै भावना कन्ने अगे बदा र दा ऐ। प्रधानमंत्री होरें वॉलीबॉल ते विकास बश्कार दी समानता दे बारे च आक्खेआ जे वॉलीबॉल टीम भावना जगान्दा ऐ ते इस खेड दी प्रकृति देश दी विकास-गाथा जनेई गै ऐ जिसदे च हर कुसै थवा सहयोग दी मेद हुन्दी ऐ। राष्ट्रीय वॉलीबॉल टूर्नामेंट 11 जनवरी तक च लोगा। इसदे च मुख्य भरै दे इक हज़ार सोयां मते खडारी हिस्सा लै'रदे ना। इस खेड दे आयोजन कन्नै वाराणसी, राष्ट्रीय खेड आहले नक्खे पर आई गेआ ऐ।



Shivraj G Ram G

ग्रामीण विकास मंत्री शिवराज सिंह चौहान होरें आक्खेआ ऐ जे मनरेगा भ्रष्टाचार दा इक पर्याय बनी चुकी दी ही, जित्थे मजदूरे गी अकसर दरकिनार करिए उन्दा शोषण कीता जन्दा हा। नमी दिल्ली च संवाददाताएं कन्ने गल्ल करदे होई उनें आक्खेआ जे कांग्रेस विकसित भारत रोजगार ते आजीविका गारंटी मिशन-ग्रामीण-जी राम जी क़ानून गी लेईऐ जनता गी गुमराह करा'रदी ऐ। उने आरोप लाया जे पार्टी मनरेगा गी नेई, सगुआं इसदे च होआ र दे भ्रष्टाचार दी राखी करना चाह रदी ऐ। चौहान होरें आक्खेआ जे विशाल बजट दे बावजूद, मनरेगा नै कुसै मुकामी संपत्ति सृजन या ग्राएं दी लौहकी अवधि विकास गी बढावा नेई दिता। उने आक्खेआ जे विकसित भारत-जी राम जी क़ानून श्रमिकें दे हित च ऐ कि जे इसदे च बदे दे भुगतान, बेरोजगारी भत्ते, बेरोजगारी भुगतान पर ब्याज ते सौ दी तुलना च सवा सौ

दिन दे रोजगार दी गारंटी दिती गई ऐ। श्री चौहान होरें आखेआ जे इसदे क्रनै मजदूरे दी आर्थिक स्थिति बेहतर होग ते ओहू ग्राएं च सार्थक योगदान बी देई सकोग। चौहान होरें आखेआ जे विकसित भारत आस्तै विकसित ग्रां जरूरी न ते सतत नतीजे आस्तै ग्रामीण रोजगार दे बजट च बडा मता बादा कीता गेआ ऐ। उने दस्सेआ जे ओन्दे माली बरे च डेढ लक्ख करोड़ रूपे सोयां मते दे आवंटन दा प्रस्ताव कीता गेआ ऐ। इसदे चा 95 हजार करोड़ रूपे सोयां ज्यादा दी राशि केन्द्र सरकार देगी।

<><><><><><>

## Shivraj Crop

राई-बाई ते करसाने दे कल्याण सरबंधी मंत्री शिवराज सिंह चौहान होरें जानकारी दिती ऐ जे बरे 2025 च भारत दा चौल उत्पादन 150 मिलियन टन थमां मता रेआ ऐ। चौहान होरें भारती कृषि अनुसंधान परिशद आसेआ विकसित बेहतर गुणवत्ता आहली 25 फसलें दी 184 नमीं किस्में दे उद्घाटन मौके पर आखेआ जे भारत नै चौलें दे उत्पादन आहले मामले च चीन गी पिच्छे छोड़ी दिता ऐ।

<><><><><><>

## ECI-Net App

चुनांs आयोग नै ई.सी.आई नेट ऐप पर सुधार आस्तै लोकें थमां सुझा मंगे ना। इस ऐप पर लोक अपने सुझा 10 जनवरी तगर देई सकदे ना। आयोग नै मतदाताएं गी बेहतर सेवा ते चुनां सरबंधी जानकारी देने आस्तै एहू डिजिटल मंच बनाया ऐ। चुनां आयोग मुजब ऐप पर परीक्षण संस्करण बेहतर मतदाता सेवाएं, मतदान फीसद रूझानें दी तेजी कन्नै उपलब्धता ते मतदान मुक्कने दे 72 घंटं दे अंदर-अंदर सूचकांक काहडें दा प्रकाशन करना ऐ। इस ऐप दा बिहार विधानसभा चुनां 2025 ते ओदे मगरा होए दे उप चुनाएं दरान सफलतापूर्वक परीक्षण कीता गेआ ऐ।

<><><><><><>

## EAM Concern

भारत नै वेनेजुएला दे हाल दे घटनाक्रम पर ढूंगीरी चिन्ता जाहिर कीती ऐ। विदेश मंत्रालय नै इक बयान च आखेआ जे भारत, वेनेजुएला दी स्थिति पर नेडमी तक्क रक्खा'रदा ऐ। भारत नै वेनेजुएला दे लोकें दे हितें ते सुरक्षा प्रति समर्थन बी जाहिर कीता ऐ। भारत नै आखेआ जे सारे पक्खें गी तमाम मुद्दें दा शांतिपूर्ण हल करना चाईदा तां जे क्षेत्र च शांति ते स्थिरता बनी दी रवै इसस दौरान वेनेजुएला दी राजधानी करा-कास स्थित भारतीय दूतावास भारतीय सुमदाय दे सम्पर्क च ऐ ते उनें गी हर संभव सहायता देआ र दा ऐ।

<><><><><><>

## EAM Indian Nation

विदेश मंत्रालय नै हाल दे घटनाक्रम गी दिखदे होई भारती नागरिकें सोयां वेनेजुएला दी सारी गैर जरूरी यात्राएं थमां बचने दी सलाह जारी कीती ऐ। वेनेजुएला च कुसै बी वजह करी मौजूद सारे भारतीयें गी बड़ी मती सावधानी बरतने ते अपनी गतिविधिएं गी सीमित करने ते कराकस स्थित भारती दूतावास दे संपर्क च रौहने दी सलाह दिती ऐ। दूतावास दा ईमेल ऐ [cons.caracas@mea.gov.in](mailto:cons.caracas@mea.gov.in) ते आपातकालीन फोन नंबर +58412&9584288 ऐ।

<><><><><><>

## Veneauala Acting Press

वेनेजुएला दी सुप्रीम कोर्ट नै उपराश्ट्रपति डेल्ली रोड्रिगेज होरेंगी देसै दे कार्यवाहक राश्ट्रपति दा ओहदा साम्भने दा हुक्म जारी कीता ऐ। एहू फैसला राश्ट्रपति निकोलस मादुरो हुंदी गिरफ्तारी दे बाद लैता गेआ ऐ जिनेंगी कल अमरीकी सेना नै हिरासतै च लेई लैता हा। राश्ट्रपति मादुरो ते उंदी घरै आहली पर अमरीका खलाफ साजश दे तैहत नशीले पदार्थ ते थेआर भेजने दा आरोप लाया गेदा ऐ। तोआई, संयुक्त राश्ट्र सुरक्षा परिषद नै वेनेजुएला खलाफ अमरीका दी कार्रवाई गी संजीदगी कन्नै लैदे होई कल इक बैठक सद्दी दी ऐ। एहू बैठक कोलंबिया दी गुजारश पर सद्दी जा'रदी ऐ जेहदा चीन ते रूस नै बी समर्थन कीता ऐ।

<><><><><><>

## UAE

संयुक्त अरब अमीरात यू.ए.ई नै आखेआ ऐ जे ओहू यमन दे घटनाक्रम पर करीबी कन्नै नजर रक्खा'रदा ऐ। यू.ए.ई नै लगातार बददे तनाव पर चिन्ता जाहिर करदे होई यमन दे लोकें थमां संयम बरतने ते मुख्य दी सुरक्षा ते स्थिरता बनाई रखने दा आग्रह कीता ऐ।

<><><><><><>

बांग्लादेश हिन्दू-बौद्ध-ईसाई एकता परिषद दे नेताएं कल बांग्लादेश नेशनलिस्ट पार्टी - बीएनपी दे कारजकारी अध्यक्ष तारिक रहमान हुन्दे कन्नै राजधानी ढाका च मलाटी कीती ते पार्टी दी अध्यक्ष ते साबका प्रधानमंत्री बेगम खालिदा ज़िया हुन्दा काल होई जाने पर दुख ते बसोस जाहिर कीता। बैठक च, अल्पसंख्यक नेताए खालिदा ज़िया गी इक मज़बूत ते कुसै बी चाल्ली दा समझौता नेई करने आहली नेता दस्सेआ जिने देशै दे लोकतांत्रिक आंदोलन च महत्वपूर्ण भूमिका निभाई ही। नेताएं आक्खेआ जे सुश्री खालिदा हुन्दा काल बांग्लादेश आस्तै नेई पुरने आहला नुक्सान ऐ। अल्पसंख्यक नेताएं बांग्लादेश च अल्पसंख्यकें खिलाफ़ हाल च बददी हिंसक घटनाएं पर चिंता जाहिर कीती ते 8 सूत्री मगं उन्दे अगगे रक्खियां। नेताएं अनुरोध कीता जे बीएनपी इने 8 सूत्री मगें गी अपने चुनाव घोषणा-पत्र च शामिल करै। तारिक रहमान होरें अल्पसंख्यक नेताएं गी आक्खेआ जे आम जनता दी सुरक्षा यकीनी करने ते लोकतांत्रिक संस्थाएं दे पुनर्निर्माण आस्तै क़ानून-व्यवस्था दी बहाली जरूरी ऐ।

<><><><><><>

## RDI

हुनै थवा 3 वरे सोयां घट्ट अवधि आहले स्टार्टअप बी अनुसंधान, विकास ते नवाचार कोष दा लाहू लेई सकडन। वैज्ञानिक ते औद्योगिक अनुसंधान विभाग - डी एस आई आर दे मंत्री डॉ. जितेंद्र सिंह होरें मैहकमें दे 41में स्थापना दिवस समारोह च, नमी दिल्ली च आक्खेआ जे हुन नमे स्टार्टअप बी पंजीकरण कराईए इस कोष दा लाहू ठोआई सकदे न। डॉ. सिंह होरें आक्खेआ जे सरकार नै परमाणु क्षेत्र ते अंतरिक्ष क्षेत्र गी निजी क्षेत्र आस्तै खोलने जनेहू केई महत्वपूर्ण फैसले लैते न। सिंह होरें आक्खेआ जे भारत, प्रधानमंत्री हुन्दे आत्मनिर्भर भारत दे नजरिए गी मूरत रूप देआ र दा ऐ ते इक ऐसे देशै दे रूप च उभरा रदा ऐ जेदे पर भरोसा करने आहले देशें दी गिनतरी तेजिया कन्नै बदा र दी ऐ। उने देशै दे अनुसंधान ते विकास ते नवाचार पारितंत्र गी मजबूत करने आस्तै केई महत्वपूर्ण पैहलें दी जानकारी दिती।

<><><><><><>

## Budget Session

लेफ्टिनेंट गवर्नर मनोज सिन्हा होरें औंदी 2 फरवरी गी जम्मू-कश्मीर विधानसभा दा बजट इजलास सद्देआ ऐ जेहडा बडुलै 10 बजे एल.जी हुंदे अभिभाषण कन्नै शुरू होग। उमर अब्दुल्ला सरकार नै रमजान महीने दे मद्देनजर इस बजट इजलास गी तय समें शा पैहले लोआने दा आग्रह कीता हा। ध्यानजोग ऐ जे रमजान दा महीना औंदी 20 फरवरी दे कोलकश शुरू होग ते एह्दे 21 मार्च तगर चलने दी मेद ऐ। सरकार नै रमजान दे दरान इजलास च वक्फे दी बी तजवीज कीती ऐ। एल.जी हुंदे आसेआ विधानसभा दा एह इजलास सद्दे जाने दे मगरा सदन दे सचिव मनोज कुमार पंडित होरें बुलेटिन जारी करियै विधायकें गी आक्खेआ ऐ जे ओहू 12 जरवरी तगर अपने सोआल, 15 जनवरी तगर प्राइवेट मैम्बर बिल ते 17 जनवरी तगर अपने प्रस्तास जमा करोआई देन।

<><><><><><>

## IMD

मौसम विभाग नै अज्ज दिल्ली, हरियाणा, चंडीगढ़, पंजाब, उत्तर प्रदेश, बिहार ते ओडिशा आस्तै घने छाए रौहने दी चेतावनी जारी कीती ऐ। मध्यप्रदेश, राजस्थान, उत्तराखंड, हिमाचल प्रदेश, झारखंड, पश्चिम बंगाल, छत्तीसगढ़, जम्मू ते कश्मीर, लद्दाख ते भारत दे उत्तर-पूर्वी हिस्सें च बी कल तकर घना कोहरा रहोग। अगले दो सोयां त्रै दिनें तकर दिल्ली, हरियाणा, चंडीगढ़, पंजाब, बिहार, उत्तराखंड ते राजस्थान च शीतलैहर दा अनुमान ऐ। इस दौरान राष्ट्रीय राजधानी क्षेत्र दिल्ली च, हवा गी गुणवत्ता अजें बी बडी खराब श्रेणी च बनी दी ऐ। अज्ज दपैहरी 1 बजे राष्ट्रीय राजधानी च औसत हवा दी गुणवत्ता आहला सूचकांक 301 दर्ज कीता गया।

<><><><><><>

## MoS Kathua

केंद्री राज्यमंत्री डॉ. जितेंद्र सिंह होरें कठुआ जिले च हाल च आए दे हाडें करी ढाचें गी होए दे नुकसान लेई जारी फंड दा निरीक्षण कीता। उनें आक्खेआ जे केंद्र नै 1 ज्हार 400 करोड़ रपे बागुजार कीते न। एहू रकम जम्मू-कश्मीर च सार्वजनिक संपत्ति ते ढांचे गी होए दे नुकसान लेई जारी कीती गेई ऐ। कठुआ लेई 10 करोड़ रपे आंशिक तौर पर चीजें गी ठीक करने जिसले कि 2-2 करोड़ रपे हर ढांचे गी पुज्जे दे नुकसान लेई न। सिंह होरें आक्खेआ जे इक हफ्ते दे अंदर-

अंदर प्रस्ताव तयार करने लोडचदे ते सरबंधी कम्म अगस्त तगर मुकम्मल होना लोडचदा। उनें आखेआ जे उज बहु उद्देशीय परियोजना गी परतिए नमें सिरेआ तयार करिए नरेंद्र मोदी हुं'दी अगुवाई आहली सरकार नै एहदे कन्नै इक नैहर सरबंधी सरिस्ते गी बी मंजूरी दिती ऐ तां जे पाकिस्तान आहली भेठा बगने आहले बादू पानी दे बहाव गी रोकेआ जाई सकै।

<><><><><><>

### Khattar- Reasi

केंद्री बिजली मंत्री मनोहर लाल खट्टर होरें आखेआ जे जम्मू-कश्मीर च दफा 370 हटाए जाने मगरा टकोहदा ते महत्वपूर्ण विकास दिक्खने गी लब्भा'रदा ऐ। रियासी च राष्ट्री स्वयंसेवक संघ आसेआ आयोजित इक हिंदू सम्मेलन च बड्डे किट्टु गी संबोधित करदे होई केंद्री मंत्री होरें आखेआ जे दफा 370 गी हटाए जाने कन्नै केंद्र शासित प्रदेश च विकास, शांति ते समावेशी विकास दे नमें रस्ते खुल्ली गे ना। उनें आखेआ जे बेहतर बुनियादी ढांचा बेहतर शासन ते निवेश च बाद्दा होने कन्नै हून इस क्षेत्र च बदलाव आवा'रदा ऐ। खट्टर होरें आखेआ जे जम्मू-कश्मीर दे लोक केंद्री कल्याणकारी योजनाएं थमां लाह हासल करा'रदे ना।

<><><><><><>

### Mughal-Road

जम्मू-कश्मीर दी ऐतिहासिक मुगल रोड गी गड्डिएं दी सीमित आओजाई लेई खोलने दा ऐलान कीता ऐ ते इस बवस्था दे तैहत् छडी हौली मोटर गड्डिएं गी तय समें दरान गै उत्थे चलने दी खुल्ल दिती जाह्ग। हासल जानकारी मूजब मुगल रोड पर बड्डुलै साड्डे 10 बजे शा लेइयै दपैह्ली गी चलने दी इजाजत होग। एहू फैसला शिडक दी स्थिति ते मौसम दे सूरतेहाल गी दिखदे होई ते खासतौरा पर 'पीर गी गली' आले हिस्से दी स्थिति दे आंकलन मगरा लैता गेआ ऐ कीजे इस हिस्से पर स्यालें दरान बर्फबारी ते तलैहट आले हालात मते बने दे रौहंदे ना। अधिकारिएं मूजब कुसै बी बड्डी मोटर गड्डी जां जात्तरी गड्डी गी फिलहाल मुगल रोड पर चलने दी इजाजत नेई दिता गेई ऐ।

<><><><><><>

### Under-19 Cricket

अंडर-19 क्रिकेट च भारत नै त्रै मैचें दी श्रृंखला दे पैहले इक रोजा मैच च मेजबान दक्खन अफ्रीका गी इकबर्थ लुइस स्टर्न डी.एल.एस नियम दे तैहत् 25 रन कन्नै हराई दिता। पैहले बल्लेबाजी करदे होई भारत नै 50 ओवरें च 300 र बनाए। परते च बरख करी मैच बाधित होने करी पैहले दक्खन अफ्रीका 27 ओवर ते 4 गेंदें च 148 रन

<><><><><><>

### VDG-Training

जम्मू दे अरनिया, आर.एस.पुरा ते कानाचक्क दे बन्ने आहले ग्राएं थमां ग्राम रक्षा समूहें दे तकरीबन 85 सदस्यें गी जम्मू आले जिला पुलस लाइन्स च बडी सख्त सिखलाई दिती जा'रदी ऐ। जम्मू दे एस.एस.पी जोगिंद्र सिंह होरें इस कार्यक्रम दा उद्घाटन कीता। सिखलाई आले इस कार्यक्रम दे दरान इ'ने वीडिजी सदस्यें गी आत्मरक्षा, आटोमैटिक थेआर चलाने, बंकर बनाने ते दुश्मन दे हमलें गी नाकाम करने लेई लोडचदे गुर सिखए जा'रदे ना। ध्यानजोग ऐ जे इ'ने वीडिजी सदस्यें दे ग्रांस अंतरराष्ट्री बन्ने दे बडा नेडे न जिस करी उत्थे घुसपैठ ते ड्रोन गतिविधिएं दा खतरा लगातार बने दा रौहंदा ऐ।

<><><><><><>